

CULTURA

L EUREGIO à recordé la spartizion dei ladins nte sua »Juoba Culturala«

N juoba passada, nte la senta del Euregio de Bolsán, l é sté metù a jì n event n colaborazion col Istitut Cultural Ladin Cesa de Jan

Nte chëst ann mpermò scomecé, trop vignarà metù a jì per no desmentìe i cënt agn de la spartizion del popol ladin per mán fascista. N juoba ai 19 de jenè, l é sté l Euregio l prum a recordé chëst aniversiar. L Euregio à tres bù gran conside-razion del popol ladin e de sua storia; l lengaz ladin l é tres vignù conside-razion un dei trei lengac ufiziai de chësta istituzion.

Ajache chësta l é na istituzion che à sue reisc nte chëla che l é sté la storia del vegle Tirol, nte dut l prozes de costituzion, fin dal sco-mencé, i trei comuns ladins de Souramont à tres bù n raport istituzional e ntei agn l é vignù fat troc varenc nnavánt: da mpuò de agn, nfati, l raprezentánt nominé dai trei comuns l tol pert a dute le ncontade ufiziai a nivel euroregional.

Levent...

Nte la senta de Bolsán, n colaborazion col Istitut Cultural Ladin Cesa de Jan e la soziazion culturala »Waaghaus«, l Euregio à metù a jì na sèra culturala dassënn nteresciánte. Al publich l é vignù prejenté chi che l é i ladins de Souramont: ci che i à vivèst nte la storia e ci che i se speta al di da ncuoi. Trei èle à conté sua storia de vita: na storia de fantajia, ma che ten cont dei prinzipai fac storizi che à segnè nosta comunità. À scomecé na mèda ampezana, nasciuda ntel 1800: dèla la mper-sonificáva la semplicité. Ntel se prejenté, l'à dit »Io son coscí, scéta come che son«. La s'á proieté ntel 1912 e l'à conté sua vita nte chi agn:



l »Kropya«: n grop de jovegn ciantarins fodomi nsignei via dal prof. Roberto Marchione.



La »Waaghaus« de Bolsán, senta del Euregio.

©Alta Digitalazione

i agn sot l Imper Austroungarich, co l é pié via l turism n Ampèz. L eva mpermò sté fat su la »Grosse Dolomitenstrasse« e, siebello Ampèz che Fodom, ava n conliament diret con Bolsán. A la fin del Votcënt l eva ence nasciù la Cooperativa e la Cassa Rurale, spo doi istituzion che ncora al di da ncuoi à n gran valour per la comunità ampezana... e souraldut, nte chi agn, degugn se spetáva che fossa prest sclopé la viera e dut chël che l é vignù pro. Delongo davò à descörèst na jovena da Col, nasciuda ntel 1923, che à fat a finta de ester drìo a conté sua storia na sèra ite per jenè del 1946... sua prejentazion l'é sté »Chel che

vive, me segna per dagnora«. Dèla l'à conté de la pruma viera, veduda da suo pere e da sua mere; de le opzion e dei burc fac suzedus ntánt la seconda viera. Fin davò la seconda viera Fodom, Col e Ampèz i n'á passé de duc i colour: chësta jovena, nasciuda davánt de la spartizion, l'eva ncora na zitadina sudtiroleje, fia de n saudè jù n viera coi Kaiserjäger e de na profuga sciampada fora n Puster con sua fameia: spo, fia de optánc che toruna nta Col ntel 1946, ma che no stá ben gnánca a cesa sua.

Per saré via, na jovena fodoma, fia dei agn doimile, che l'à conté sua esperienza da ncuoi: nsomeia che

siebe ncora vera chël che ava dit chël berba fodom ntel 1600: »se jon ntei paisc taliagn, i disc che son todèsc; se jon ntei paisc todèsc, i disc che son taliagn: co l é la fin, son foresti daperdut! Ma dèla volèssa passe via i confins del ce e che no siebe plu chisc pregiudizi... Po la se damana percieche, davò cënt agn, na comunità l'abe ncora da ester condizionada dai confins de la tiera e del temp. La n'á assé de vive nte na tiera de confins e la volèssa che chësta sua tiera ladina de Souramont la devente l usc delvièrs de l'Europa: na Europa de le mendránze, na Europa dei popoi. La siera ite dijan: »Mi nte chëst spere, nte chëst

ciaurieie... Spere demè de no ester da sola«.

L acompagnament mujical

Nte na sèra dedicada ai ladins de Souramont, no podéva mancè la mujica. Nánter ite à cianté n valgugn toc i Kropya, n grop de jovegn fodomi che s'á metù auna, debota per cajo, ntel 2014! »Kropya« fossa la modernisazion de la parola ladina »croppia« (l bánchez de glièja): chëst percieche, l pum viade, i à cianté nte na croppia – plutost strenta – de la glièja de Larcionei. I Kropya, nsignei via dal prof. Roberto Marchione, i à cianté per ladin, per talián e per todèsch.